

嘉慶松江府志

松江府志卷五十四

古今人傳六

明

林景暘字紹熙華亭人隆慶二年進士選庶吉士授禮科
給事中神宗幼冲小璫客用等在左右景暘進十二箴
又疏請正大明會典宗藩事例皆允行轉兵科巡視京
營請廣召募立選鋒均糧賞勤教演凡十餘事時張居
正當國綜覈名實景暘所奏皆得施行軍政爲之一新
進太常少卿改南通政進太僕卿丁父憂服闋家居不
出會當事欲改金山衛爲州景暘遺書撫按謂設州必

多置官吏所治少而所擾多事得寢巡撫胡執禮令所屬縣田出助役錢率七十畝徵一金景暘固爭遂得減十之七捐田百畝助學又以三百畝贍族年七十五卒子有麟字仁甫以父廕歷官龍安知府清勤有才略祀

龍安名宦祠孫希顯自有傳

通志參修
林氏族譜

蔡汝賢字用卿青浦人隆慶二年進士授大名府推官佐治水著勞績擢爲御史疏劾勳戚無顧忌執政與漳浦令朱孟有隙諷汝賢以事中之不應後朝議以王守仁從祀廟廷汝賢因上疏乞以李侗羅從彥從祀又請復青浦縣治皆從其言出爲四川參議累遷廣東左布政

晉副都御史巡撫廣西遷南京兵部右侍郎致仕汝賢
通籍年已四十有六敷歷中外二十餘年未嘗歸里所
至以清介稱未第時喪偶終身不復娶待人接物有道
之氣穆然可挹卒年七十二著有諫垣疏草披雲彙集

若干卷

陳志
賢達

喬木字伯梁爲諸生試輒冠其曹倭難起從父鏜禦倭屢
出奇計隆慶二年成進士知安吉州州民苦歲貢栗木
上言罷之管內民田腴瘠相錯吏因緣爲奸木句股其
田區別高下豪右無所容私天目諸山水陡發往往齧
城損稼木築斗門得免衝激遷潞安同知潞爲藩王治

歲給將軍中尉以下祿萬計皆親授不假胥吏其豪橫者摧抑之擢井陘兵備井陘扼燕晉之衝北控倒馬所轄千餘里木一障乘邊戢守悉備茨溝營卒盜礦多烏合衆竄不可迹乃選土著八百人充伍漸汰諸募者盜遂息歲稔便宜發倉全活甚衆遷福建參議均稅平徭躬行節儉尋以病歸居川沙募衆濬渠二十里以時蓄洩會風飄海舶邏者以倭告木止勿殺檢牒乃朝鮮貢使導之歸具表以謝卒祀鄉賢又祔祀父鏗仰德祠子拱宸郡諸生究心經術拱宿任兩浙鹽運副使平鹽筴修醴志拱璧另有傳

陳志
賢達

曹銑字子良華亭人隆慶二年進士授行人司歷兵部郎
出爲漳州府漳俗好鬪很銑至多方化導民平情釋忿
無相讎有黎秀才者以小隙訐訟連年銑霽威爲好語
激發之感泣求息番舶歲輸羨餘以充經費銑悉赦之
卒於官無以斂僚屬爲捐俸成之

金山志

宋堯武字季鷹華亭人世居虹橋隆慶二年進士知信陽
州改惠州林道乾者擁衆數萬相小琉球三年將謀奪
其國國人不從乃復航海六年春率舟師突至將士皆
譁堯武登舟以義諭之道乾乃仰天言曰明公以德言
綏我逆之不祥顧語健兒簡部內惠州女子十八人委

之泥沙而去丁母憂服闋補福州守尋掌嶺北道晉參
滇南分守金滄姚關戍兵懷異志語憲臬不之信尋起
事執通判某去堯武亟勒兵截其歸路賊飛走俱窮遂
乞降巡按御史謂守臣曰早從參知寧至是邪初撫臣
李公材征緬甸捷還忽訛言濫敘婦人級御史訪之堯
武曰李公以道術自期明公奈何發大難會有構之者
御史意遂決露章上天子震怒緹騎逮撫臣至擬午門
誑言律人皆冤之御史懊悔而人愈益重堯武後告歸
卒年六十五有八子文學茂韶最賢孫徵璧自有傳

志略參郭
志名臣

陸從平字履素華亭人居郡城望仙橋應寅季子隆慶二年進士令清豐調停保馬之役民得息肩爲建生祠祀之擢南京營繕主事權稅蕪湖處脂不潤有大賈置金酒罌中爲壽正色卻之晉都水郎中出爲漳州守謫知灤州移判臨江尋守思南播曾方蓄異謀遂上書中丞纒纒數千言度其變必起已而往勘嚴爲之備思民賴以無恐遷兩浙轉運使鈎稽積弊更新約束商民兩便大計以齒邁註考遂歸實則年尙壯也鍵關謝客日以課子爲事暇則結社賦詩留心撰述著有鼓音集燕思齋稿熬波集明農集行世卒年七十五

雲間人物志

諸純臣字午泉華亭人隆慶四年舉人任河南府推官清
介之操一時無出其右者以病歸

河南通志

金從洋華亭人隆慶五年進士知曲江縣累官至貴州參
議分鎮銅仁會蠶苗亂營壘未立卒伍多羸弱從洋按
地形規要害以松桃爲川苗門戶宜扼吭而守之因築
營堡屯兵守禦賊不敢窺時官弁恣睢市井騷動白撫
臣嚴禁民若更生在官二年志潔行廉外和中毅諸將
吏感且畏之擢嶺臬去民遮道送有臥轍者貴州通志
高文炳本姓王上海人隆慶五年進士授四川敘州推官
叙有三峒名九絲蠻者孟獲遺種也時出擄婦女財貨

遇官兵卽入關關名凌霄地斗絕蜀撫曾省吾初爲旁
邑令值蠻出幾爲所害及撫蜀議進討檄取文炳贊畫
文炳定計以端午節行乃自裹氈與敢死士從山後掩
至賊方醉不知所爲遂奪其關馘蠻王阿大阿耆等設
武寧衛城功上晉秩一階入刑曹出知慶遠陞貴州憲
副致政歸卒年七十六

陳志
賢達

許樂善字修之華亭人隆慶五年進士知邳縣人爲御史
掌河南道典甲辰大計晉南光祿卿改南通政使請告
歸樂善在邳蠲除酒稅修築邑城邳民賴焉在臺值張
居正奪情都御史率諸御史上公疏慰留諸御史皆署

名樂善爲居正門下士獨不署按畿南有東強令倚門
第爲不法劾治其罪主計時條上六事遂著爲令甲又
疏請停礦稅救建言得罪御史曹學程舉朝稱之其後
兩起卿秩旋赴旋歸所著有適志齋稿卒年八十賜祭
葬曾孫纘曾自有傳

婁志

唐本堯字世承上海人隆慶五年進士授金溪知縣廉明
練達承前令廢弛之後加意振刷時條編之法初行他
邑多疑阻本堯行之分毫不擾課諸生文體丕變召拜

監察御史歷江西副使貴州參政

江西通志

李伯春字友卿上海人昭祥從子也隆慶五年進士授刑

部主事以明允爲尙書嚴清所器重使修定條例晉郎
中出知濟南府屬歲饑民王登以妖言煽衆擒置之法
登妄稱內外黨千餘人皆勿問出倉穀鉅萬斛賑貸人
心遂安遷浙江按察副使轉湖廣參政守陵中貴孫某
欲奪民沙洲田又橫索里夫折直皆挫抑之尋以母老
棄官歸有兩弟仲春叔春皆親自教授叔春登萬歷己
丑進士除福州府推官丁艱起台州入爲刑部郎陞歸
德府知府值河決後城郭傾圮飢民數萬聚葦澤間剽
掠監司欲興兵叔春固請解散之皆感泣來歸又蠲逋
責給牛種戶口漸復後論調歸起按察副使乞休伯春

兄弟同堂共爨友愛甚篤仲春當伯季仕宦常主奉養
孝謹尤著年五十四哭母過哀卒室無餘財伯春以產
均授其子郡守喻均表其廬曰一門孝友伯春第二子
後學萬曆戊午鄉薦仲春孫之楠天啟辛酉舉人之杜

國朝順治以明經貢太學

郭志
名臣

前汝爲字毅夫華亭人三歲失母父明時親鞠之從膝上
授句讀比長力學隆慶五年成進士授德化令縣當九
江孔道弱者患貧瘠獷悍者多出沒萑苻中乃授方略
縛渠魁釋蓮染請截歲餉以備兵荒不二年縣大治議
築郭州隄自小池西岸抵德化贅延袤三千八百餘丈

疏山鑿石下竹爲榭壘小池口水門一區崇三丈闊丈餘旱潦蓄洩邑民永賴稱爲俞公隄丁內艱服除補壽陽調建德當路倚重擢南駕部出爲山東僉事請罷張秋稅局有讒者遂歸侍養起知沁陽州興學校賑饑荒撫流移修文中子祠創州志政績多可紀患風痺歸踰年召爲南京工部郎不起卒年七十一所著詳藝文中子廷諤天啓甲子舉人以博雅稱陳繼儒修郡志廷諤

實佐之

郭志
名臣

馮時可字元成華亭人大理恩之第八子隆慶五年進士授刑部主事累官浙江按察使敗歷中外咸有治績尤

以著述爲海內所重弱冠登第遷轉刑兵兩曹歷事五
尚書凡有建白輒屬時可起草肆力爲古文辭日益有
名已由薊門歷河洛荆蜀入夜郎去國益遠作西征集
自粵而楚而浙往來萬里作超然樓集里居及僑寄吳
閩日文譽四馳作天池石湖皆可縑霞北征諸集晚年
登太行陟羅浮南踰金齒汎舟彭蠡洞庭作後北征燕
喜溟南武陵諸集他如寶善編藝海酌五經諸解尤
有關繫窺古作者論者謂時可父兄忠孝己獨以文章
名世雖文人相輕或議其詩文汗漫要其著書滿家不
失爲一時之冠居鄉亦以長厚稱

參修松
風餘韻

莫是龍字雲卿以字行更字廷韓方伯如忠子也生有異
資十歲能屬文十四補博士弟子員工古文詞書畫陵
轍今古意氣豪逸一時諸名流無敢抗席學使者高其
名行不次貢於庭時宰有欲以翰苑處之者是龍意不
屑也王世貞汪道昆咸推重之張佳允巡撫江南彌加
欽禮居恆喜延獎後進常若不及有文集行世

郭志
文苑

張所敬字長與上海人弱冠補弟子員與陳太僕所蘊輩
並有時名又以古文詞爲王世貞所推重郡邑長折節
下之邑令顏洪範聘修邑乘纂輯之功居多

郭志
文苑

徐璠字魯卿相國文貞子也爲諸生以廩授右府都事轉

後府經歷旋轉宗人府經歷遷知廣南府未任改尙寶
丞會建萬壽宮兼工部營繕司主事工成賜四品服擢
太常卿仍領司事進通義大夫廕一子隆慶二年文貞
致政歸璠亦請假回籍璠多才略識大體其在右府時
有降寇百餘人璠待之恩威互濟在後府念所轄爲畿
輔險要於驗放傳警必詳必慎上供薪葦商人例有餽
金璠盡卻之性孝友文貞薨廬墓六年置祭田以供歲
祀復置田六百畝以贍宗族鄉人之役於官者最苦主
庫璠上書兩臺罷之卒年六十四賜諭祭曾孫本高貴
晉贈榮祿大夫太子太傅子元春字正夫號寅陽年十

六補諸生隨父官京師寄錦衣籍改順天府學生舉萬
歷元年鄉試明年成進士授刑部主事改禮部選員外
郎歷官光祿尙寶卿陞太僕少卿擢正卿旋晉太常卿
元春登第時祖階方謝政家居遺書戒以毋躁進毋上
人毋標榜立門戶元春揭諸座右朝夕諷覽率循惟謹
從宦二十年所在侃侃持正咸有成績官兩曹用法平
恕嘗雪孫元垂死之冤在祠部條上因革大典咸著爲
令乞養歸築愛日堂以奉父父子皆官太常司寇王世
貞稱其三世皆三品上文武忠孝爲人倫之極年五十
卒著有西堂集孫有慶字豫章號台室性嚴毅負經濟

才嘗謁王文肅於京邸文肅器重之語人曰徐豫章不愧世家子未冠襲世職積資至三品有慶初補廕時分巡中城適東廠有緝獲事緹帥劉某委訊之有慶燭其誣劉恐忤大璫意有慶靦然曰朝廷所恃者法耳屈法徇情某不能也其剛正如此年二十九卒

徐氏家傳
參鄉評錄

徐繼溥字汝文文貞階孫官邵武通判有能聲憲長某謂之曰若世家子吾爲若地以一札候中朝某貴人當得內轉繼溥佯謝歸具文詳請病假弟肇美字章夫以錦衣衛武生仕本衛百戶亦以不屑謁崔魏告歸終身自

放於詩酒

竝徐氏世
德紀略

允達號澄源上海人少聰穎有聲成均仕大官丞時堂
庫耗損臺使將彈主卿允達以贏羨充之所全實多出
監汀州再判慶陽督餉士卒悅服亢旱禱雨神應林居
二十載屢舉鄉飲賓醇謹誠篤卒年八十

上海志

姚章字尙綱上海人志尙高逸詩有陶謝風書法宗黃魯
直嘗游荆溪陽羨閒愛其山水清僻遂移家焉後又至
采石之紅木山市地數畝結屋棲遲卒年八十四卽葬
山麓子雲字時望家貧績學上海令鄭洛書興社學禮
聘爲師亦山林淹博之士

上海志

俞寰字允寧華亭人居青村樸愿忱靜喜讀書工詞賦然

不求人知甘貧守分終歲不一入城市故人亦少知之

志上海

田有相字道子華亭人年十七補博士弟子員性恬逸學使者按部校士以醉失期遂棄去居泖上治圃藝橘每秋深時綠陰朱實侍父杖履游行其際具旨醕爲樂父因號橘莊翁人稱有相爲孝隱云

南吳舊話

張拙字汝吉上海人能詩善篆隸隱居不仕陸文裕深引爲社友嘗和深白槿詩深擊節推爲擅場詩云嬾隨宮女候羊車欲嫁潘郎鬢已華誰向上林承雨露自甘僻壤飽煙霞幽情肯許題紅葉澹影常教占白沙卻笑阿

矯金屋貯最深恩寵不藏瑕其風操可想矣

上海志

張昉字元旻華亭人性狷介固守窮約或竟日不舉火董
傳策慕其人以幣交不受訪之亦不報邑令屠隆造訪
避弗見贈金弗納索詩不與惟陸彥章餽以酒粟輒受
曰此賢者之惠不妨我廉也其詩集存彥章家書畫皆
得古人風骨居南郊之敝廬曰蚊睫巢一童力作日得
粟以供食童死困甚假道院以居年七十餘卒

妻志

吳爰字翼夫上海人以詩名高企師事之顧文僖清稱其
山林日長無外物以撓其志故其言蕭散閒靜無世俗
綺靡脂韋揚袖倚門之態可以知其人矣著有雪窗詩

行於世

上海志

張允孝更名初字太初華亭人人稱貞白先生少游文徵仲之門工六書長於詩善繪畫璩之璞其弟子也晚居沙岡墓廬曰楓庵家甚貧未嘗以藝求於世足不履城市者四十年陸文定樹聲指爲雲閒伯夷

郭志
隱逸

王嗣釋字霆叔華亭人年十七與叔避倭金山夜雪極寒臥米囤上語叔曰此李愬擒吳元濟時也明日青村以不守告叔由是奇之下帷攻誦以淹洽稱嘗坐庭中雨驟溢命童子疏渠得饗金妻丁疑母家所藏遽命還之後植榴他所又得金還之如初素不同生產家日落然

苦節彌勵唐宗伯文獻許通政樂善章虞部憲文楊宮
諭繼禮竝少與同學貴顯後過從多不見見亦不報謁
有所贈遺亦堅不受也一日憲文飲次謂君屢空若此
得無有所苦乎嗣響指杯案閒物曰吾不作是想無所
苦也憲文歎息曰君少慕井丹高潔今果似之矣旣取
老壯窮堅二語號兩益居士著傳以自見門下士甚盛
咸以禮法約束之有劉生者以喪來謝家中爲設酒嗣
響曰汝於禮不得飲乃引自酌其峻直如此性嗜學至
老手不釋卷詩宗盛唐五言律尤澹永稱獨步沒後學
者私謚爲貞簡先生子藻鑑廷宰俱能世其學廷宰字

毘翁以貢爲沅江令有文采亦無宦情藻鑑孫廣心竝

國朝順治己丑進士

郭志獨行

陸時伊字汝莘上海人以病棄儒業農而貧遂葺圃於舍旁荷鋤汲水不以爲勞暇則手一編傍大樹長嘯遇人簡率無寒暄問不噉人一飯不受人一錢終身不識府

縣門

雲間人物志

陳夢庚字台錫華亭人居蕭塘與弟嗣元孿生一時有張伯皆仲皆之目夢庚以萬歷二年登進士歷官刑部郎中出爲湖州知府遷福建運使謫守柳州擢松潘副使左遷陝西少參初與鄒元標同事西曹元標廷杖夢庚

讓視無所避生平小心謙謹卽村夫童穉敬禮不敢慢
居官不名一錢所居老屋數閒炊煙亦時或不起也嗣
元二十六年進士歷官工部轉江西參議其治行載韻
州名宦夢庚屬纊時子尙幼嗣元撫育之門戶悉倚辦
焉在藩司未久旋拂衣歸卒嗣元子汝睿天啓元年舉
人郡志
獨行

彭汝讓字欽之華亭人諸生入國子監中萬歷元年副榜
爲隆萬詩文社十八子之一著有北征南游擊筑諸稿
弟汝毅字秉中諸生亦以詩文名子維曦字東陽性至
孝汝讓坐羣留郡守李多見事中蜚語被收考掠幾斃

維曦上書請代辭甚楚陸文定王文肅聞而憐之致書
直指俾白其枉家難既夷室如懸罄汝讓多憂生之作

維曦從而和之聊用寬解焉有鶴和草一卷

奉賢志
參裏志

蔡倫字樂山青浦人裔出宋儒沈後十世祖光祖移家雲
間卜居唐行鎮倫與汝賢爲從兄弟少孤事後母以孝
聞高朗豪雋時譽翕然隆慶四年濬吳松江萬歷元年
議復縣治移建唐行倫並董率民夫襄大役知縣卓鈿
舉其行上於朝給八品秩年七十餘卒子象春字元淳
行誼端介嘗質郡人尤氏綰帛攜歸覺其貨倍以所餘
還之崇禎十四年歲祲有士族子金姓者自鬻象春知

之破其券而遣歸焉

青浦志

徐三重字伯同青浦人居七寶祖壽父沛竝潛德勿耀三
重萬歷二年進士授刑部主事時政尙綜覈三重獨持
平恕尙書嚴情知其詳慎使掌封事每有疑獄必咨決
焉冢宰欲用爲銓曹而三重得疾請急歸念父老遂致
仕依親以居父卒慟絕而蘇三重操行端潔門庭肅穆
坐無雜賓少博洽工詩文旣謝病歸一切棄去潛心性
命之學以朱子爲宗學者稱爲鴻洲先生所著有庸齋
日記信古餘論庸景錄采芹錄鴻洲雜著徐氏家則年
七十八卒子禎秩以孝謹稱禎稷自有傳秩子銘敬稷

子銘常皆登賢書

邦志
名臣

秦國士字友善上海人萬歷四年舉人從父嘉楫無子欲以爲後不應食貧如故嘉楫卒族人爭嗣者議分田宅笑卻之蒼頭挈貲來歸者皆弗納終瀏陽縣令

南隄志

王明時字治甫華亭人居虹橋萬歷五年進士知冀州改莒州莒多盜又民易逋賦明時至爲革火耗嚴贓質數月後賦清而盜戢境內大治晉刑部郎有伐陵樹者株連至一百二十人逮赴刑部擬罪法司欲悉置大辟力爭乃閱原奏凡盜樹者三次以每次爲首者論斬餘俱遣戍全活甚多出知岳州府歷南安贛州二府擢河南

按察副使乞養母遂不出明時居官垂二紀歸葺屋數
椽以貧故及身棄之亦不以屑意也子垣惠字元維萬
歷三十七年副榜性友愛重然諾從祖佺家饒於財生
子敏甫而月佺病亟密以重貲四篋託孤於垣惠乃攜
歸撫視成立其四篋封閉一室分毫無所動病將沒乃
徧召親族出篋付敏封識宛然啓視則所直以巨萬計

妻志

馮大受字咸甫華亭人孝子行可子少負才名工書法爲
王世貞莫如忠所器重萬歷七年領鄉薦因公事者三
十年謁選得陽山縣改教餘姚擢知慶元縣致仕歸五

竹素園吟詠其中子弟罕見其面著有竹素園集從弟

大咸亦有文學

妻志

鍾薇號面溪華亭人居陶宅微時不喜文墨迨子字淳貴始折節讀書窮搜徧覽遂成通儒知府許維新者廉吏也其集中有云余守松江有事海墘因爲詩歌好事者爭和之中有時見朝霞映沃焦元氣網縕天受冶二句未經人道知爲鍾公薇詩乃求識公問政所急笑不答但言前守李多見司李畢自嚴皆長者從來官此土者得人心無如此余念公不言事而但指兩人此龐參見任棠時也後再見公言松江志書百年不復續責在太

守余曰善哉政莫備於志以志求政公意也一日從容謂公曰公嘗導我以隴西太守倘亦有事可指乎公笑曰余初以李公望公以今觀之雖言李公公亦不能爲也余固問因言曰李一意主寬善縱舍耳有青衣攝事者失期久命杖之其人曰請言狀乃受杖因坐檐下徐徐解鞵以足瘍出示李大憫恤急呼醫與治而慰遣之此事公能爲乎相與笑而罷薇後其子二十年而卒年八十餘著有面溪集雲閒紀事野史倭奴遺事諸書今皆散佚而崑山傳是樓書目有之子宇淳字履道萬歷五年進士授遂昌令在任五年平賦額清盜源修泮宮

以治行最陞南京兵科給事中前後封事凡數十上皆持大體不爲詭激會有以王守仁陳獻章請祀闕里廟庭者議久未決字淳言二臣竝應從祀詔從之尋擢福建參政便道歸省得疾卒字淳篤友誼同年鄒元標以論江陵相奪情詔廷杖遣戍字淳始終爲之左右著有

括蒼吟稿南垣奏疏

奉賢志

錢大復字肇陽華亭人萬歷七年領鄉薦知蓬萊縣下車召父老詢民疾苦撫卹流亡每月吉詣賢宮集講義以訓迪之後以子龍錫登進士致仕歸撰寶六堂銘以自箴構書院爲講學地巡撫周孔教題曰日新書院所置

祭田贍族田千餘畝宗黨咸賴之年七十一無疾而卒
以子龍錫贈建極殿大學士所著有味道編良知的證

諸書

郭志
文苑

范廷言字伯龍華亭人居漕涇萬歷七年舉人遷廣東萬
州知州值歲祲廷言蠲逋振廩民賴以全有楊奇欽者
招聚亡命往來椎埋境內騷動廷言以計擒之萑苻絕
迹黎洞蠻時逸出賊良民廷言躬往宣諭遂不敢犯又
仿邱文莊配丁田法五十畝稅一丁田漏丁悖者一切
覈實汰去之量移瓊州疾卒萬人聞之慟哭罷市數日

子景有文才

華亭志

李安祥字元定上海太居竹岡倭寇據柘林出掠沿浦安祥父堂倉卒走避寇竟爲所獲驅令負擔歸其巢安祥聞之奔仆蘆葦中屢起屢蹶日夜涕泣抵賊巢求見願以身代從衆中望見父輒啼不止父見子亦啼賊哀之與之食已易翁所肩負屬之他擄者復令安祥執蓋行至津口賊躍上船出一令箭插安祥頭令負其父歸安祥時已食飽饜序學使者耿定向旌其門曰至孝隆慶改元選貢登己卯鄉薦出知滄州子南春孫繼佑登賢

書

郭志
獨行

張秉介字子石上海人中丞鶚翼之季子也少警敏性至

孝定省兩親雖酷暑不解帶父病劇中夜祈禱願以身
代及沒舉身自擲擗踊無算既遭疾猶於室中設奠據
牀微作拜跪狀嬰嬰若兒啼有氣而無聲未幾亦卒年
二十九天啓初孫泰階疏聞於朝奉旨建坊旌表

郭志
獨行

張德燦字涵美青浦人庠生性至孝工詩文兼善青烏術
人有告竭者無不量力周助嘗早行遇遺金五十俟其
人還之以子以誠貴封翰林院修撰鄉飲大賓

郭志
獨行

高應炁字仲彩青浦人祖母曹病革應炁禱天引刀割左
臂肉作羹以進祖母食之尋愈里中父老聞於郡邑榜
其廬曰孺孝可風時應炁方舞勺讀書晝夜不輟嘔血

而死衆共惜之

郭志
獨行

曹樸字以素華亭人八歲母病手調湯藥母亡哀毀如成人稍長工書尤精鐵筆弟雲遇火救入火救母柩頭額焦爛得廢疾年久漸愈人以爲孝所致

曹氏
宗譜

王勝字子奇金山衛人以指揮使起家母有痰疾勝吞其痰母疾尋愈母卒苦困三年諱日祭祀號泣如初喪總戎間中有獻鮮荔珍錯者辭之曰吾親未嘗食也將校聞之感歎事親者莫不加孝居官清介始終不渝尙書孫原貞撫閩高其行爲樹表於通衢曰孝廉初未舉子妻劉買得一妾詢爲金千戶女立遣還不責償居鄉掩

幣飢飢多善事偶涉海遇大風歎曰吾無風波風波奈

我何風果息以壽終於家

華亭志

周士達華亭人以父號海山故號少海幼有至性事父能
得其歡心及父官豫章留事後母益敬慎父病篤額天
請代父沈迷中如聞鬼神云爾有孝子疾遂已初士達
喪母王方六歲喪繼母陳方十二歲哀毀已若成人及
父沒遂衰經終其身

王潭字克深上海人居川沙任御醫萬歷十一年海潮衝
溢漂沒人民潭瘞浮尸數百借喬鎧議築川沙城備倭
後城傾圮其孫中書乾昌舉人偕春修葺之又建水洞

石梁置茶亭便民曾孫惠州守逢年寧波通判觀光竝

以文行著稱於時

上海志

沈梅字思雲上海人居橫河南多財好施萬歷十三年旱

十四年春大饑梅出粟三千餘石以賑臺省旌之

南匯志

錢良輔字德卿華亭人父廉篤學通五經陸武惠炳欲延
致之不往官會稽教諭良輔少孤力學萬歷十年領鄉
薦祖母沈九十餘臥牀褥閒不能起良輔反哺之護持
惟謹承重居廬哀毀備至富室某欲其族叔之女爲簪
良輔怒事得已爲治匭具論婚士族范叔子以著書中
奇禍良輔白當事獲免後以母喪致毀卒子大忠字侃

臣以禮經登天啓元年鄉薦兄大孝早卒經理其產會
出入之數登諸籍撫其孤成立而還之選如臬教諭識
許直於儔人中許後以銓部殉國難人服其識鑒尋擢
國子監學錄累官刑部主事

郭志
獨行

顧允貞字叔復上海人萬歷十年鄉魁授南陽府通判值
歲祲奉委賑卹晝夜巡察災傷獲全甚衆署府篆以四
勸囚禁曉諭訟者民比之召杜遷工部員外郎陳時務
數千言不報尋致仕歸造就後學教以敦本崇實崇禎
閒屢薦不起三舉鄉飲大賓卒年七十九

南匯
志

何三畏字士抑華亭人居莊行少穎拔爲名諸生徐文貞

階勸其北游遂魁十年壬午榜屢躋公車就選得紹興
府推官會有刑節婦事拒貴人請抵訟者於法中蜚語
擬改調遂歸遭母喪誓墓不復出構芝園日與賓客爲
文酒會賦性伉爽有古豪士風凡臺使長吏式廬造請
者必開陳利病無所隱諱晚歲尤專心撰述卒年七十

五

郭志
文苑

高洪謨字九畹上海人舉萬歷十年順天鄉試第一由太
平教諭遷穀城令有善政旋謝事歸在穀城所獎拔多
名俊識方岳貢於髫年及岳貢守松江洪謨已沒展墓
修敬焉

上海
志

方應選字衆甫華亭人居方家巷十歲善屬文萬歷十一年進士知冀州州多大猾有昏暮納棍舉中託發喪以行劫者廉得之漏下三刻疾馳五十里往捕成就擒旋丁內艱起復汝州治多異政輯汝州志峻整有法識者謂可埒康德涵武功志擢職方改武選時議封倭曾本兵力主之應選抗言不可勿聽已而見給東師果敗又議盡撤東南兵應選復言不可出爲憲臬視兵盧龍會石門兵變應選開陳禍福戮其不用命者事遂定先是以曹郎衡文八閩得人最盛錄文式畿省遂改督閩學政多士傾心焉以勞瘁卒於官年五十四

陳志
賢達

章憲文字公觀華亭人萬歷十四年進士官虞部郎督潞
王行殿於通灣權璫主乾沒憲文持議堅不能奪又督
漕艘於淮釐剔積弊省采木金以萬計丁外艱服除又
丁母艱遂絕意仕進著有陶白淮南白石山房諸稿從

子元衡萬歷二十六年進士元復天啓元年舉人

妻志

唐文獻字元徵華亭人珣四世從孫萬歷十四年進士殿
試第一授修撰乙丑分校南官時光宗爲太子出閣文
獻爲講官每講畢大璫出揖不通一言丙申遷中允丁
酉轉諭德尋以病告己亥起原官庚子晉庶子兼侍讀
壬寅晉少詹事兼侍讀學士宰臣沈一貫以妖書事傾

尚書郭正域持之急文獻奮袂曰天日昭昭可昧昧邪
偕其僚楊道賓周如砥陶望齡往見曰郭公將不免人
謂公實有意殺之一貫跼踖面赤若爲誓者文獻曰亦
知公無意殺之也第臺省承風下石而公不早竟此獄
何辭以謝天下一貫斂容謝之獄得稍解文獻旋拜禮
部右侍郎掌翰林院事然頗失政府意矣初文獻出趙
用賢門以名節相矜許同年生給事中李沂劾張鯨被
廷杖文獻掖之出資給其湯藥荊州推官華鈺忤稅監
逮下詔獄文獻力周旋五載得無死掌翰林日當考察
執政欲庇一人執不許甲辰副考會試乙巳卒於官贈

禮部尙書賜祭葬天啓閒贈太子少保諡文恪祀鄉賢
文獻生有雋才面如削瓜性直諒喜面折人過無敢干
以私侍講帷尤以端勤肅穆稱文章爾雅家書語語可
爲訓著有占星堂集先是父敷錫夢巨神降於堂印有
文曰敷子魁而文獻亦數夢上殿廷若承日在躬者及
冠多士侍講筵皆符所兆云子允諧天啓四年舉人
姚士豸字邦憲華亭人居五保萬歷十三年舉人授九江
推官江州關推素爲商病士豸汰冗役除苛徵政聲播
遐邇遷德慶知州不受請託與上官意忤遂歸

金山志

施大經字天卿上海人居牖港宋華亭令退翁十一世孫

萬曆十三年舉人署丹徒教諭遷江西瑞州府通判時稅璫方議采木大經抗言曰開采名爲利民其實厲民篁箐深阻民迫將爲盜貴人能豫爲撲滅地平璫語塞遂止郡有娼婦涂氏族人利其貲誣以陰事婦家因吏黃某暮夜進千金大經曰枉而白之我分也奈何汚我杖吏卻金卒白其冤積二載引疾歸再起惠州通判轉崇府審理告歸著有澤谷農書子沛溥沛字沛然天啓初以貢除河南廉州通判雅度雍容署欽州首建文廟優禮俊髦凡里甲供應一切陋規悉爲詳革復設法擒宿盜造渡船民咸賴之議時務十二條語多切中會出

師勤王給素袍士卒諱兵備楊嗣昌以屬沛使易五色時已夜沛悉召梓工以萊菔雕花朱墨雜印作彩前後以絳布綴日月形黎明畢具師遂發轉南康同知歸後嗣昌督師致書邀沛許以監司沛堅謝不赴尋卒沛素知醫家言既罷官益精其術活人甚衆弟溥自有傳郭志

名臣參廣
東通志

潘可大號星海青浦人少貧力學縣令屠隆寒夜巡城聞茅屋中讀書聲迹之則可大方讀漢書以此得名萬歷十三年舉人初任慈谿教諭學道某以所作詩屬書可大指其落韻雖忤不顧也陞衛學教授遷知縣乞歸從

弟可觀字貞所少慧年十二補縣學生久之以歲貢任
常州府訓導母年高善怒一日撻婢齧其指血沾衣可
覲跪而泣曰母齒無傷否母怒旋解郡稱爲孝子改補
餘杭識鮑奇模於諸生中後奇模爲縣令一不干以私
可大子衷駿字震開萬歷四十三年舉人能詩文工書
早沒可觀子衷昉字公亮天啓四年舉人與弟衷皓皆
以孝弟樂善著

青浦志

徐爰字彥文華亭人父陟傳見前爰以父廕仕通政司經
歷遷上林苑丞苑故有中官領其事欲令丞長跪見同
官莫敢抗爰疏劾之引祖訓及會典甚數中貴衛之思

中傷不得聞遷太僕丞有詔選宮人炎復疏言彗孛告
警天意不虛臣惟下民之最苦而以得免爲幸者莫如
選取宮人昔嘉靖閒嘗有是舉民間爭出女子應詔乃
今事同而趨避異者陛下天威所擊無不摧折積畏深
恐亦既有日一旦聞詔選取不啻驅犬羊而之屠肆乖
氣致異上千天象非偶然也疏上不報然事賴以寢萬
歷十八年擢力克挾其部落火落赤侵西鄙殺略吏民
當事者懦無策舉兵部尙書鄭洛往經略炎上疏累萬
言請斬經略本兵二重臣以謝天下直聲大震本兵憤
甚而炎亦告歸年四十四卒弟坪字直卿號在庵以上

舍生選授山東濮州州判遷湖廣衡州衛經歷奉職惟
謹時以民閒疾苦陳諸憲長辦賑務按戶分給災黎得
被實惠去官之日送者數百人家傳

李諫字格卿青浦人萬歷十六年舉人署金壇教諭入爲
南國子學正遷工部司務刑部員外郎擢守四川敘州
郡歲散軍餉每有贏前守以入橐沿爲例諫屏卻之致

政歸卒年七十七子世祺壬戌進士官太僕卿

陳志賢達

施大諫字叔顯上海人幼穎悟弱冠登萬歷十六年賢書
不樂仕進閉門注老莊寒暑不輟子紹莘字子野少爲
華亭縣學生負雋才跌宕不羈初築丙舍於西柰之北

復構別業於南柳之西自號峯柳浪仙好聲伎與華亭沈龍善世稱施沈時陳繼儒居東柰詩場酒座常與招邀來往工樂府著花影集行世早天無子時論惜之

南

舊志

殷廷樞字執夫華亭人父汝孝以舉人官嘉祥鉅野二縣令有惠政廷樞萬歷十七年進士由部郎歷官河南按察司僉事分巡河北劇盜王好問嘯聚覃懷聞放手四劫殺命吏拒官兵勢張甚廷樞以計殲其魁而置餘黨勿問境內以安立射圃以課材官招流亡以闢荒土設文會以造英才尋晉本省右參議分巡大梁政績卓然

在人口丁祖母憂服闋補福建布政使卒於官

奉賢志

朱正色字穉曾上海人居沈莊允五世孫萬歷十七年進士知淄川縣聽訟多平反喜課士雖愆劇不廢入爲刑部主事恤刑閩中詳讞明允晉郎中曹侍郎學程以建言忤旨論死夏月例得熱審正色語大司寇曰今日之恩獨無片紙加曹君如白雲丹筆何曹得未減論戍出守杭州白汴守冤稅使劉成橫覘攤市物民罷市正色舉正之濱海遷卒指琉球賈人爲寇至磔以倖功正色白部使得生還者十九人累擢山西少參政告歸卒年

七十七

南雁志

陳所蘊字子有上海人萬歷十七年進士授南刑曹歷員外郎中性方嚴有坐法當訊者介大司寇及所蘊座師爲關說所蘊卒按其罪有鐵面郎之目調南選郎參藩江岳副憲大名所至有聲督學中州謝絕請託尋擢參政分守大梁有奸弁上疏請核河南羨帑者乘驛按問同事震懾所蘊折服之弁坐妄言罪未幾乞休後起山西按察使疏辭復起南京太僕寺少卿甫半載歸地方有大利弊往往以片言指陳當事郡邑重之卒年八十

四 陳志
賢達

吳桐字晉明華亭人居璜溪萬歷十七年進士授杭州推

官入爲兵部主事乞假歸恬靜端介不驚榮利家居十二年始起故官久之進光祿丞天啓中累遷南京太僕卿魏忠賢私人石三畏追論炯黨庇顧憲成落職閒住崇禎初復官炯家世素封無子置義田以贍族人郡中貧士及諸生赴舉者多所資給嘗輸萬金助邊被詔旌

獎明
史

董其昌字元宰華亭人父漢儒耿介力學其昌初就塾比夜漢儒從枕上授經悉能記誦成萬歷十七年進士選庶吉士禮部侍郎田一備以教習卒官其昌請假走數千里護其喪歸葬還授編修知起居注光宗出閣充日

講官因事啓沃光宗每目屬之主考江西尋有忌之者
出爲湖廣按察副使陳疾歸三十二年起爲湖廣提學
副使踰年致仕起山東副使登萊兵備河南參政竝不
赴光宗踐祚問閣臣曰舊講官董先生安在乃起爲太
常寺少卿掌國子監司業天啓二年改兼翰林院侍讀
學士纂修實錄奉詔至江南采錄諸司掌故凡萬歷朝
章奏案牘輯爲三百本其留中之疏有切於國本藩封
人材風俗河渠食貨吏治邊防議論可施行者別爲四
十卷倣史贊之例每篇系以筆斷成書表進有詔褒美
宣付史館三年遷少詹事掌南京翰林院轉禮部右侍

鄧四年充纂修實錄副總裁同知經筵尋轉左侍郎五年遷南京禮部尚書時政在奄豎黨禍深酷其昌深自引退遂謝政崇禎四年召拜禮部尚書掌詹事府事七年進太子太保乞骸骨溫旨慰留章七上乃允賜乘傳還九年卒年八十二贈太子太傅諡文敏其昌天才俊逸善談名理少好書畫臨摹真蹟至忘寢食中年悟入微際遂自名家行楷之妙跨絕一代畫集宋元諸家之長論者稱其氣韻秀潤瀟灑生動非人力所及也

明史

陳繼儒字仲醇華亭人幼穎異能文章同縣徐階特器重之長爲諸生與董其昌齊名太倉王錫爵招與子衡讀

書支硎山王世貞亦雅重繼儒三吳名下士爭欲得爲
師友繼儒年甫二十九取儒衣冠焚棄之隱居崑山之
陽爲廟祀二陸構草堂數椽焚香晏坐意豁如也時錫
山顧憲成講學東林招之謝弗往親亡葬神山麓遂築
室東余山杜門著述雖短翰小詞皆極風致兼善繪事
又博聞強識經史諸子術伎裨官與二氏家言靡不校
覈或刺取瑣言僻事詮次成書遠近競相購寫徵請詩
文者無虛日性喜獎掖士類屢常滿戶外片言酬應莫
不當意去暇則與黃冠老衲窮峯泖之勝吟嘯忘返足
迹罕入城市其昌爲築來仲樓招之至黃道周疏稱志

尙高雅博學多通不如繼儒其推重如此御史吳牲給事中吳永順侍郎沈演等先後論薦謂繼儒道高齒茂宜如聘吳與弼故事屢奉詔徵用皆以疾辭卒年八十

二自爲遺令繼悉畢具

明史

陸可交不知何許人結廬干山人莫識其名陳繼儒一見異之與之飲叩知姓氏談易洞徹剝復損益之道發先儒所未發論史則指陳往代興亡詳切時勢語及當世惟蹙額唏噓而已旣而謂繼儒曰子雖遁迹而好以賢智先人是求顯也何足語至人之道必也閉爾明塞爾知去爾田廬棄爾妻子變姓名混迹於世庶可免累乎

繼儒去未幾可交自焚其廬逝去不知所往

南吳舊話錄

李尙袞初名袞字補之上海人府孫少聰穎焯掌讀書直指尙維持巡海觀風奇其文曰是不凡因以姓加其名以志一時賞識因名尙袞後以進士授兵部主事爲諸生時師事王龍溪遂精理學究心六壬奇門火攻戰器及漕運河防子中梓別有傳

南匯志

顧鳳翔字振羽華亭人居漕涇拓落不羈游京師日就塘報中傭書占籍中武科值邊警戒嚴中樞蒿目鳳翔從邸報中熟情形萬歷二十年會試場中首策問及東事條對甚悉大司馬石星詫爲奇才遂掄大魁歷官閩廣

至四川總戎會稽曾亂守禦甚力又督川兵赴援遼左

游歷邊帥甚著功績

曹家駒雜著

唐之屏字君公華亭人居金匯橋萬歷二十年進士除常山縣下車與民更始築願豐壩以時蓄洩立常平倉以備饑荒禁溺女以厚風俗戢豪強以安良善止開礦以絕紛擾民既獲安乃置良田構精舍擇諸生有志者日課而月程之士風丕變以中譏罷歸不復出之屏嘗謂知義知命知天知時知足遂顏其堂曰五知云

奉賢志

楊繼禮字彥履華亭人萬歷二十年進士由庶常授編修與修實錄所撰后妃外戚傳時稱直筆歷贊善中允充

日講官晉諭德掌南京翰林院病卒繼禮性至孝嫡母曹氏卒哭之淚盡繼以血居官時楚中有警戍撫臣移檄郡國有順流而下語神宗以問親臣繼禮言此不過恫喝語耳不久自定閣臣以置對後果如其言平生敦尚友誼沒之日識與不識皆哀之子女成天啓五年進士官至禮部侍郎

郭志名臣

朱家法字季則上海人豹孫察卿子萬歷二十年進士出守信陽州值大旱賑活飢民鉅萬擒大盜陳三川等州境以寧時中官奉旨采礦所至暴橫惟信陽以家法故得罷采州人德之歷官工部郎中卒祀名宦

上海志

沈時來字君大華亭人居瑄湖橋學士粲裔萬歷二十年
進士除行人奉使寧夏卻其餽遺典試雲南所拔皆名
士乞歸數載始授御史董役長陵巡閱三關庫寺京倉
出按江西以暴疾卒於途時來在西臺省陵工浮冒以
鉅萬計條革糧長解額公私便之惜不究其用云

陳志賢達

蔡紹襄字仲謨上海人以貢選貴溪訓導萬歷二十八年
中江右榜官瑞昌令地介江表會陳友諒遺孽有柯王
二姓幾三千人爲寇紹襄以計擒渠帥六七人餘衆懾
服居官清介致仕歸貧撫庶弟成立子文陞舉人爲

巴陵令有惠政

南匯志

王孫熙字君文華亭人萬歷二十三年進士令侯官侯官
號難治令素以鉤距勝孫熙獨務簡靜獄訟用息丁母
憂去職服闋除天台令入爲大理寺評事有巨璫坐法
行萬金求免孫熙曰爾金如山我案亦如山論如律大
理卿救之執不可出守台州地有麻鬼不知織購工爲
機杼教以經緯之法俗生女多不舉嚴禁止之所育女
皆任織衣被一方號爲王公布郡成卒多悍餉稍遲輒
譟孫熙能戢之萬歷四十一年子元瑞成進士卽引疾
歸元瑞字伯禎授太和令以治最徵拜御史遭母喪終
養不仕孫熙年八十八卒

通志

高承祚字元錫華亭人士從子初名承禪萬歷七年鄉試
得薦將發榜主司及京尹以其名與試題彘命禹合爲
改今名二十三年成進士選庶吉士尋丁父憂服闋入
部臨朐馮文敏琦公安袁宗道等皆以公輔期之二十
八年授檢討明年分考會試奉使四封藩王歸里得疾
踰歲不起年僅四十七時論惜之承祚性好吟詠與同
部蔡懋孝馮大受楊繼禮相倡和近體秀整高華歌行
雄邁有致文筆似曾王而能自運機杼郭志文苑曝
書亭詩話
范允臨字至之華亭人惟丕子蚤孤贅吳門徐氏因家焉
善屬文尤工書法萬歷二十三年進士授工部主事歷

雲南提學僉事福建參議夫人徐淑亦工詩翰倡和成
集嘗築園天平山凡范氏義莊先祠靡不興葺一日析
理後事訖端坐而逝子雲威後改必英工詩文入

國朝由舉人薦舉鴻博官翰林院檢討

吳志參修
鶴徵錄

顧正心字仲修一字清字華亭人參議中立子也以諸生
入太學任俠好交游家中落乃謀什一歲入頗饒輒以
周三竊萬歷十六年歲饑出粟二萬行賑詔旌其門授
光祿寺署丞初江陵當國民逋賦至五百兩梟首縣藁
街郡里甲沈堯臣張楠六人駢斬南郊正心應役主供
張引囚與酒食惻然垂涕曰天平傷哉是皆以役而耗

賦也役困不蘇死者將益衆竭吾心力必爲拯之遂請於朝蠲私財買田贍役用錢七萬四千七百緡母子相權積十六載得四萬八百餘畝分貼細布收辦以至學校城池倉廩監獄坊廂埠頭津夫驛卒靡不分給公私蒙利又設濟荒義學贍族諸田他如繕治巽宮館舍橋梁不可勝紀當是時花園顧氏以義聲振天下然縣令某猶以事致之獄正心因葺獄舍悉代輕繫入贖鍰令愧而遣之晚歲以羨金三萬兩呈請貯庫營青浦役田未就疾革以屬其子懿德懿德斥產復置萬畝以成父志臺使疏請褒異辭弗受然是時合邑蘇而顧氏猶力

役如故士民羣請代之役始命復其家懿德後從選人
得光祿寺署正子善有練達有祖風知府方岳貢清駁
役田其力爲多又議以濟荒羨米置田贍上海業有成
緒而岳貢去官善有亦尋卒其中廢時論惜之

鄉評錄

朱一德字士隆上海人六世祖木有詩名一德篤學醇謹
適館拾遺金侯路側頃之一人號泣至曰吾父捕官錢
繫於獄故賣妻贖之而失於路遂還其金萬歷十六年
登賢書寓南都中夜有艾婦卽之秉燭待旦終不及亂
味爽卽徙之後寓居郡城之南二岳見廟中尸骨無主
者捐田葬瘞里中謝某陷大辟當死知其冤辨於官出

之不受一錢生平廉潔自好及其沒也囊橐如洗搢紳

爭賻焉

郭志
獨行

朱朝貞字孟元華亭人系出宋徽國文公少爲名諸生曾就西安丞不踰年卽投劾歸嘗謂文必東西京可無辱子墨詩必開元大歷可無卑宮商所爲詩賦古文其才故足辦之爲人悃悃無華落落寡合好咀茹釋典與衲子話無生有武邱吟草等集存於家年近八十而卒子

蔚字文豹詳藝術

雲間
志略

顧斗英字仲韓上海人父名世尙寶丞斗英負雋才磊落不羈喜賓客選勝宴游無虛日所居有園林之勝能賦

別古器圖書疊洗畢具左右與華亭莫廷韓風流文采
相頡頏人稱雲間二韓能詩有盛唐風格善奕工書畫

年三十七卒子昉之亦工書翰能詩

陳志文學參
明朝詩集

范謙初名廷啓字叔子華亭人萬州知州廷言弟也日誦
萬言補縣學生名與兄埒是時才士多以輦輓相高乃
作文機十論矯之又著一家言一時推爲赤幟尋上書
學使者請削博士弟子籍服山人服隱佗山長貧善病
顧汎覽羣籍高視闊步以作者自命著空明子據目鈔
兩書傲睨當世譏切時事有以陰怨言於撫軍者遂逮
繫已而出之陸平泉誠之曰無再爲足以殺其身也既

免署所居爲一寒齋以詩酒自娛年七十餘卒

陳志文學參志

略雲開
雜識

李繼佑字仍啓上海人才思橫溢爲文沈洋縱恣自成一

家與父南春先後舉於鄉著有初學集

上海志

黃希度字叔也華亭人居千山負異稟志行修潔能詩有
開元大歷閒風格每構思廢寢忘櫛不知旦暮人稱爲

苦吟先生

五其
志逸

陸應陽字伯生青浦人晚居郡城初爲縣學生被斥絕意
仕進顧名籍甚詩宗大歷學士黃洪憲及大學士許國
申時行皆折節交之當是時婁東王世貞方以詩文籠

單後進士多附之以爲名常譽應陽應陽獨不往世愈益高之然應陽雖以文名有籌幹嘗修復孔宅議擴郡城多所施設又好遠游故其游稿凡二十三種又有樵史太平山房詩選行世卒年八十六作詩喜用鴻雁字故人呼爲陸鴻雁云

青浦志

高燁字赤餘上海人副使木家孫父拱宸起家中翰贈祠部員外郎燁恭謹雅飭未嘗以門第自高少好學不爲名士習以副榜貢入北雍會開史局高選名彥燁首與焉歷掌制誥直起居纂修玉牒授內閣撰文中書舍人晉禮部儀制司主事尋轉員外郎郎中在職敬慎爲少

師葉文清向高所器居鄉以孝友著聞子舒爲諸生以

文翰世其家

上海志

楊學禮字伯立上海人少與陸文裕深齊名中歲以病廢與曹宏濟滕奎結詩社日相唱酬有寄陸文裕秋興一

律世爭誦之

上海志

黃調元字孟和上海人父崇道以貨殖起家遇貧不能舉火喪不能葬者輒捐橐助之歲饑宗人就食者常數十人調元早歲食餼善詩古文詞與弟燮元並有才望董其昌李世祺皆令其子師之著有鹿田集同時諸從禮號海門弟秉禮皆孝友長厚縣大徭役必力任之年俱

七十餘卒

青浦志

俞汝楫字仲濟華亭人內行醇備性和易終身不見喜愠
少有文譽究心理學兼綜經濟之務嘗與東林講席顧
文端憲成高忠憲攀龍竝重之應大宗伯命輯禮儀志
百卷病卒里中私諡爲端慤先生知府方岳貢改曰清

惠

郭志
文苑

李煥然字子文上海人長史伯璵曾孫性恬雅絕意進取
教授里中祠部張烈侍郎蔡汝賢其高第弟子也從子
可教字受甫年十二能屬文趙貞齋遴爲贅壻年十八
補諸生其先世儲書萬餘卷遭倭寇悉散佚可教多方

訪購風鈔雪寫得遺十五六校雠點勘丹黃爛然課貞
齋二子補諸生督其子逢原逢申世其學生平砥礪名
節爲鄉閭所重逢申自有傳

上海志

黃廷鳳字孟威青浦人以歲貢任大理府同知定雲龍州
之亂改世官爲銓鹽井課不登臺使特委之削耗羨浮
額三月而辦歲課十之六會中州王彭伯掌銓事覈實
績超擢武定府知府卒

青浦志

顧憲字克載上海人端方鎮靜有古人風貢入京師廷試
第一授黃陂教諭訓諸生必先德行以身範物化行一
邑黃陂祀之名宦歸里時策紫竹杖訪友清談未嘗乘

軒嘗舟行墮水猶讓同溺者先登其不苟類如此學者

稱遜齋先生

上海志

呂克孝字公原華亭人居七寶父錦官通判克孝萬歷二十五年應天鄉試第一主考朱國祚葉向高甚器之選如臯教諭纂輯邑乘簡核有法晉國子助教大理司務轉都察院是時向高居首揆國祚並在政府克孝秉節不屑干進擢繕部郎司權荊州罷歸著詩自娛年六十

六卒

妻志

曹蕃字价人華亭人居干溪鏡子萬歷二十五年舉人授荊州通判居官廉正轄判關稅務正供外絲毫悉貯庫

仍不多報曰恐爲異時刻也神宗末以邊警徵川兵道
夷陵蕃署州篆調遣供頓有方略比出境無譁者乞休
歸房師睢陽何偉實沒無嗣蕃走三千里哭之捐金置
祭產井爲立後蕃著述甚富存有詩集五卷

金山志

姚永濟字通所上海人祖一祥肄業太學嘗拯湖州一生
於厄不問姓名後除臨江知事有直指劉某按部見一
祥名召謂之曰余故湖州遇難生也無以報公察有冤
繫五人罪可釋公第與言可致千金一祥卽上繫者名
直指釋之詭云得金實不受一時傳爲盛事永濟萬歷
二十六年進士初令東陽植歲荒設法賑濟多所全活

豪家婢不及時婚配者罪其主薄俗頓改妖民嘯聚山谷討捕之餘黨悉降調永嘉遷刑部主事擢禮科給事中時楚藩被誣禁錮子女一百二十餘人永濟上疏言其冤上感悟卽詔歸國在諫垣章數十上直聲大振崇禎二年備兵太原尋轉浙江右布政絰吏議歸永濟好參同內景家言采類書二百餘卷爲學撮六卷年九十卒弟永豫外衛經歷好施樂善有祖一祥風

上海志參東陽

縣志

莊則孝字慶卿華亭人居朱涇萬歷二十六年進士授興化推官歷南兵部郎中有循績事親至孝內外無間言

以孝行旌於朝祀鄉賢

金山志

張以誠字君一青浦人弼元孫萬歷二十年選貢太學遭生母喪或以壓嫡爲辭且便省試以誠泣謝不可持服如制萬歷閒制舉業嘉興馮夢禎會稽陶望齡同郡董其昌相繼稱宗匠以誠後起清純高古與三人竝稱二十九年成進士廷對第一授修撰旋丁母憂孺慕無閒所生服闋起知起居注遷左春坊左中允以東宮久虛講席上言宮闈非進學之地內侍非勸學之官宜命皇太子出御講筵以重國本慰人心援引得失詞旨剴切時諭建之四十一年轉右春坊右諭德壬子主試福建

所得士皆名俊以誠舉止安雅敦尚名節以古人自期於經史百家朝章典故莫不該洽門無雜賓勤於筆墨短牋小疏咸出手裁文章宗歐蘇詩擬孟襄陽小楷規摹大令清勁有法屢乞省親未報會使命旋里父卒哀毀過度遂咯血不起年四十八著有國史類記毛詩微言酌春堂集須友堂集子安茂順治丁亥進士

鄒志臣

張以謚字伯安青浦人以誠從弟少嗜古爲文章與以誠聲譽相埒知縣羅朝國有國士之知後朝國躋九列以謚未嘗通一札也同學徐方廣王宇春聞啓祥等咸推重其文年四十餘棄諸生號純叟自爲志狀人稱其曠

達年八十五卒著有來燕堂集

青浦志

徐禎稷字叔開青浦人三重子萬歷二十九年進士除刑部主事歷員外郎中出知夔州遷川東兵備道以父年七十乞侍養起補溫處道引疾歸屢薦不出以名德重江南初三重在西曹欲出一非罪者不得至是禎稷復官刑部切誠之故父子後先爲刑官皆以用法平爲世所稱三重作政要二十四條示之禎稷以家訓嚴不寄一物嘗賦詩云丙穴有魚堪作膾因風不敢寄高堂及寄語機雲山水下山仍似在山清清門廉吏人比之胡威父子子銘常字成紀崇禎六年舉人

青浦志參明詩綜

徐伯孫字得師華亭人居蔣涇橋家貧儲書養母母顛氏
病伯孫兩日連割股肉以進母病得瘳里人上其事於
巡按御史徐某表其閭且命郡邑給粟帛以周其母

志略參修
徐氏族譜

施一化字涌川上海人以諸生入太學性孝友撫二弟如
子以己產均析之歲凶出粟賑饑更割田助役詳見唐
文恪志中子于蕃字价夫事繼母以孝聞萬歷癸巳貢
成均授溧陽訓導丁艱哀毀遂不起邑人立碑以識之

南匯
志

馮大京華亭人邑諸生恩孫達可子達可病劇大京禱於

天割股肉作羹以進絕而復蘇又三年卒大京諸孫汝

翼亦以割股旌

婁志

張可成青浦人萬歷二十三年父守誠卒成鬻身營葬母
馮患病醫禱不效割股以進病隨愈同縣又有張楸者

亦以割股愈母

郭志
獨行

周應文華亭人居白沙里三歲失母萬歷丁酉秋父患心
疾醫禱莫效欲往普陀求方救父遂自割胷深闊各三
寸餘卽投海漂二十里水至脛不沒至柘林有磐石遂
坐其上所開竅若析榴然晝夜不飢不癢會百夫長吳
某以母病乞方還舉以授文文欣然剗血和藥進父服

之立止

郭志
獨行

朱永泰字雲陽上海人耽讀不治生產徐文定光啓延訓其子及文定居相位屢邀不赴郡守方岳貢推舉鄉飲優禮備至子維垣維屏皆諸生孫錦自有傳

南匯志

俞肇初華亭人早喪母竭力事父晨夕得歡心父病侍湯藥必嘗而進迫沒就墓縛茅爲棚晴耕雨織至老不徙每祭號慟如初喪人皆感動願請旌揚肇初泣辭曰子道多缺敢望人知邪知事黃某表其廬曰純孝可嘉又令里中刻石墓旁曰廬墓芳蹤時萬歷三十五年五月

華亭

志

羅光位字明巖華亭人居千山父以怨家誣侵糧繫金陵

光位年十六往來奔救聞御史按部單身走風雪中沿舟號呼至夜力竭歐血僵雪中幾死已而聞雞聲復驚

起奔號如故數日後御史聞白其冤釋父歸三十始娶

勤耕織爲菽水歡山陰王思任有篤行處士傳

五茸志逸

宋堯咨字中允華亭人父坤好游久客吳中產盡耗堯咨

迎還故鄉曲盡孝道事母尤謹偶入城忘告半道回船

還白乃行性喜著書及卒有肱其稿去者遂失之

奉賢志

張所望字叔翹上海人居龍華里萬歷二十九年進士除

刑部主事奉使榮襄靖江三國餽遺一無所受諸王雅

重焉出守衢州衢俗囂訟而奸民左右兩造聞舞智設
機譎詭不可詰所望廉得之閱牒輒知主文者某某卽
逮訊窮治剖決若神遷副使備兵蒼梧時嶺表法令弛
所望至繕城隍實倉廩簡屯戍若藤峽崑崙鬼門句漏
諸要害無不身歷慰撫窮山炎谷喜見大吏皆搏頽受
約束有羅運徭者阻溪洞戕熟徭所望馳檄諭之遂輸
貢爲編戶漢以來所未賓也轉左江參政隆峒長官黃
兆基少子與其兄遺孤爭襲仇殺累年所望討平之將
吏請郡縣其地所望曰師以定亂奈何斬人祀以自利
邪置其長而還擢廣東按察使不就起爲湖廣按察使

理漕政時兵興轉輸煩亟以積勞疾作解職歸再起山東右布政使固辭不拜所望清羸如不勝衣顧卒當大事擇可而爲之雖拔山力莫能移急人之難唯恐後嘗買一婢詢知爲名家子撫爲己女擇婿爲匱具以嫁之年八十卒初粵有吳向春者善爲蠶所望拘至窮治之遂滅其術人稱快焉生平著述甚富有梧溇雜佩嶺表游記福員名義考文選集註辨疑龍華里志等書行世

郭志名臣參
上海縣志

張鼎字世調華亭人登從孫萬歷三十二年進士改庶吉士授檢討天啓時官少詹事上保身養性勤學敬天法

祖親賢納諫信令卹民存體十事語斥近習魏忠賢惡之擢南京禮部右侍郎上疏引疾忠賢責以詐疾要名削其籍崇禎初起故官協理詹事府旋改吏部右侍郎未上卒諭祭諡文節

婁志

徐光啓字子先上海人萬歷二十五年舉鄉試第一又七年成進士由庶吉士歷贊善從西洋人利瑪竇學天文歷算火器盡其術遂徧習兵機屯田鹽筴水利諸書楊鎬四路喪師京師大震累疏請練兵自效神宗壯之超擢少詹事兼河南道御史練兵通州列上十議時遼事方急不能如所請光啓疏爭乃稍給以民兵戎械未幾

熹宗卽位光啓志不得展請裁去不聽既而以疾歸遼陽破召起之還朝力請多鑄西洋大礮以資城守帝善其言方議用而光啓與兵部尙書崔景榮議不合御史邱兆麟劾之復移疾歸天啓三年起故官旋擢禮部右侍郎五年魏忠賢黨智鋌劾之落職崇禎元年召還復申練兵之說未幾以左侍郎理部事帝憂國用不足敕廷臣獻屯鹽善策光啓言屯政在乎墾荒鹽政在嚴禁私販帝褒納之擢本部尙書時帝以日食失驗欲罪臺官光啓言臺官測候本郭守敬法元時當食不食守敬且爾無怪臺官之失臣聞歷久必差宜及時修正帝從

其言詔西洋人龍華民鄧玉函羅雅谷等推算歷法光
啓爲監督四年春正月光啓進日躔歷指一卷測天約
說二卷大測二卷日躔表二卷割圓八綫表六卷黃道
升度七卷黃赤躔度表一卷通率表一卷是冬十月日
食復上測候四說其辯時差里差之法最爲詳密五年
五月以本官兼東閣大學士入參機務與鄭以偉竝命
尋加太子太保進文淵閣光啓雅負經濟才有志用世
及柄用年已老值周延儒溫體仁專政不能有所建白
明年十月卒贈少保謚文定

明史

黃體仁字長卿上海人居川沙萬歷三十二年進士時館

李文節廷機邸廷機令試館職體仁謝曰老矣不足以辱此選門人徐光啓者博學而賢用世才也請以自代以故光啓入翰林體仁由刑部主事遷員外郎轉郎中出知登州府罷坊市雜稅豪右斂手衛有建文忠臣陳迪子孫尙在戍籍爲陳乞脫其伍又爲迪與戚繼光請諡秩滿擢東兗道副使而福王適之國舟車填湊時值歲祲體仁裁置以法因條上臺使盡革迎謁供億諸費民得不困當路滋不悅罷歸所著奏議詩文雜著二十六卷撰續上海志田賦諸篇稱詳覈云

郭志名臣

姚士慎字岱芝華亭人居五保參曾孫九歲能屬文登萬

歷三十二年進士選庶吉士改吏科給事中累陞光祿
寺卿丁艱起大理少卿尋擢通政使晉南京刑部尙書
致仕士慎在諫垣論開礦忤旨謫官閩中佐廷尉時奉
敕推勘魏闈奸黨以六等定罪執法不阿晚年息影林
泉戒子孫由禮從儉約卒於家予廕賜祭弟士恆天啓
二年進士知浦城縣擢監察御史以著績聞

金山志

李凌雲字峻甫華亭人萬歷三十二年進士知山東諸城
縣有清節士民懷之邑先有三賢侯祠得凌雲而四焉
徵拜御史出按八閩鋤奸剔弊不爲矯激亦不可干以
私崇禎間以太僕寺卿致仕門無雜賓郡縣守令歲時

一投刺而已至清議所關未嘗不義形於色嘗有縣佐
廷辱君子合郡譁然令力庇之凌雲出持論侃侃令聞
凌雲出固已驚及見踧踖拊凌雲曰毋怒繫佐於獄衆
怒乃解同年丁化宇奉差至松暴卒凌雲捐數百金親
視含斂著有小善錄佩言晚香堂采藥編魯志

王善繼字孝冲華亭人居後岡萬歷三十二年進士授刑
部主事大璫高淮以遼左事就逮其同類馬謙亦以盜
庫鉛事發覺先後下部善繼抗議以爲二奸依憑城社
蠹邊耗國宜亟下所司究如律朝論臈之擢守建寧有
惠政以勞疾乞休當路惜之子獻吉萬歷丙午解元爲

膠州守以循行稱膠人思之

郭志名臣

陳國是字與同青浦人居珠街角鎮萬歷三十二年進士授刑部主事丁艱服闕補工部管節慎庫左遷長蘆運判轉南刑部主事員外郎郎中出爲寶慶府知府郡紳某府衆怨因與爲難羣不逞千餘人揭竿而起國是諭以威信隨解散有諸生聘妻蕭氏江川王強委禽焉生投牒愬王以書來國是立呼鼓吹爲生成禮配焉轉廣西副使移病歸國是性淳厚無城府兄弟垂白友愛彌篤每聚會輒留連經旬不忍別撫諸姪有恩子元燾崇禎九年舉人有醇行遷居郡城次增遠恩貢生

郭志循行

縉字寅美上海人萬歷三十四年舉人任南國子監丞時操江劉志選將建魏瑤祠於文廟左國縉以死爭曰誰敢爲先聖萬世罪人遂寢遷刑部郎中出爲按察副使分巡桂林時獠賊楚寇相繼犯境國縉擊走之論功以疾請老甲申三月聞變動哭不食死

朝

賜諡忠節

江南通志 欽定勝朝殉節諸臣錄

陸明揚字伯師上海人父板諸生困踐更嘗忤邑令教選會族人補謀析貲積未贖補戚曹念奪奴妻奴恚自經乃嗾念碎尸願誣析縱明揚行淫殺其夫白選選因以

報其私撈掠無不至獄成坐明揚抵臺司疑其事傳繫
青浦弟明允負糗糧走百里視其兄獄中者三年青浦
令屠隆夜行獄聞讀書聲異之察知其冤因力請平反
知府閻邦寧執不可久之始得釋析晚官浦城縣丞攝
縣事最久會上官不令粟出境而浙之江山大葭乃矯
指通羅全活無算浙人稱之明揚事旣白益發憤爲學
中萬歷癸卯舉人閱歷憂患故能究悉世務嘗請行包
補以贍貧竈改漕折以正土宜鄉里感德教諭靖江獎
掖士類常若不足沒後崇祀名宦祠著有紫微堂稿明
允字臣受性孝友時當訟獄交困外謀捍禦內奉親歡

養備至平生樂善不倦潛趙家溝尤爲一方利賴好
吟詠旁通青烏家言書法道勁有致康熙癸卯崇祀鄉

賢祠

陸氏
家傳

大綸字仲仁華亭人年十六而孤家多外侮卽能挺身
任事擒叛奴置之法諸兄皆賴之少工制舉義試輒冠
軍一時名士樂與之游然嚴於擇友無纖毫假借仲兄
圖南不善治生剖產贍之代償逋以干計沒則任葬姊
適戴氏迎養終身伯父敬庵依之以老喪葬皆盡禮三
黨老弱咸倚以爲命性甚介外家楊氏無子貽資數千
金堅辭不受邑中權貴勢盛大綸略不畏避及海剛峯

涖政郡人皆齟齬權貴貴人慮其爲梗以汶陽返之綸
曰吾豈乘人之厄者邪竟不受剛直慷慨力行古道年

六十卒

吳騏集

方道行字省吾華亭人居金匯塘西正學先生九世孫初
正學遺孤必冒在松冒姓俞語在俞允等傳萬歷三十
八年督學楊公奏明復姓於是共知正學有後而以道
行奉祀金陵道行上海縣學生篤志舉業安貧樂道竭
力捐資建祠捐田贍祭士大夫皆重之子忠祚上海縣
學生亦以文行稱

郭良俊字少谿上海人其先廬州人以軍功世襲錦衣衛

千戶後徙居邢寶湖良俊少喪父以孝聞慷慨明大義
嘗適野拾遺金堅坐以俟凡三日不獲遂以所拾金并
益己資建石梁於廟涇民不病涉卽名廟橋子繼周字
可卿天啓四年舉人

上海志

松江府志卷五十四終